

համար դռան կողքին թողնված է փրկածակ: Դուռն ունենում է միջին հասակի մարդու բարձրություն. քիչ շատ ավելի բարձրահասակ կամ փափախավոր մեկը մտնելիս պիտի կռանա: Դուռը շրջվում է ոչ թե մի կողքով շրջանակից կախված լինելով, այլ վերևից և ներքևից ունեցած կրունկներով՝ սեպերով:

Դռնով հացատօնից դուրս են գալիս սրհարը, ուր ընտանիքը փոխադրվում է հենց առաջին տաք օրերի հաստատման պես՝ ներսի մթությունից, խոնավությունից և ծխով հագեցված օդից ազատվելու համար և որտեղից կրկին ներս են մտնում հացատօնը հնարավոր եղածին չափ ուշ, երբ ցրտերն արդեն զգալի են դառնում: Դա աչ և ձախ կողմերից պատերով սահմանափակված և առջևից բաց լայն պատշգամբ է, 5—7 սյուներով՝ սուրճնիներով, բակից անջատված: Հարթ կտուրը միացած է հացատօնի տանիքի հետ և նրա պես ծածկրված է հաստ հողի շերտով: Անձրևի և ձնհալքի ջրերի հեռացման համար նրանից էլ դուրս են ցցված փայտե շրոտաններ: Կողքի պատերից մեկի մեջ, սովորաբար դռանն ավելի մոտիկ, բացված է բուխարու-օջախի լայն բերանը, որի ծուխը բարձրանում է պատի մեջ թաղած ծխանով: Այստեղ է կրակի վրա պատրաստվում կերակուրը՝ ամանը երկու քարերի կամ կասկարայի վրա դրած: Սրհարի մի կողմը հատկացվում է մատաղ անասուններին, հորթերին, «պերին և քուռակին: Հետևի պատի տակ սարքված է տախտ՝ գետնի մեջ ցցված կամ ազատ ոտներով, որի վրա կարող է ձգվել երկու-երեք անկողին, գլխավորապես ընտանիքի ծեր և հասակավոր անդամների և հարգելի օջախների համար: Հացատօնի ներսն այսպիսի տախտ միայն շատ նոր ժամանակներումն է սկսել սարքվել: Այնտեղ թե՛ փոքրը և թե՛ մեծը, տանեցին, թե հյուրը, բնում էր գետնին, խսիրներին, գորգերին, թաղիքներին փռված անկողինների վրա: Սրհարի հատակն այնքան խնամքով տփած և հարդախառն ու մազախառն կավով սվաղած չէր լինում, որքան ներսում: Կավ տանտիկիներ օգտվում է հանգամանքից և երբ ընտանիքը փոխադրվում է սրհարը, նա հարսների ու աղջիկների օգնութչամբ մաքրում է երկարատև ձմեռվա ընթացքում կիսատ մաքրված և խիստ մրտաված ու կեղտոտված հացատօնը: Առաստաղի և պատերի փոշիներն ու սարգի բները վեր են բերվում, գերաններն ու սյունները լվացվում են, մանր իրերը դուրս են բերվում, մաքրվում, արևին դրվում...

Մաքրվում և կարգի է բերվում նաև մառանը, այն փոքրիկ սենյակը, որն ամեն հացատօն աշխատում է իրեն կից ունենալ: Դա շինվում է հացատօնի որևէ պատին կպած, միակ մուտքը հացատօնիցն է: Սա մի մութ, սակավ ղեպքերում իր հատուկ հնւթքով կամ առաստաղի մոտ թողած ծակով լույս ստացող զետեղարանն է, որը Լեոնային Ղարաբաղում կոչվում է քրիզ՝ քարայր, քանի որ մեծ մասամբ փորված է լինում ժայռի կամ հողի մեջ, նույնիսկ չի ունենում կողքերին շարված պատեր: Մառանում պահվում է տան պաշարեղենի մի մասը: Այստեղ են առանձնացնում նորապսակների առագաստանկողինը, այստեղ են հյուրերի աչքերից հեռանում մատաղահաս հարսները: Սակայն, պատահում է, որ մառաններն էլ ունենում են լավ շարված պատեր և լավ ձևավորված յէրթիկավոր առաստաղ: Այս դեպքում նա դառնում է առանձն օրախր:

Հայերի հարևան ադրբեջանցիք էլ, մանավանդ այնտեղ, որտեղ նրանք անցել են նստակյաց կյանքի և հողամշակության, իրենց բնակարանները կառուցում են հացատօնի ճարտարապետական ձևերով, մեծ մասամբ այստեղ էլ: